

Alargamentu...e Alternativa

E plan sigur ta algu di elogiá. E intenshon ta ku e “Skol di Bario” lo por ofresé formashon amplio di manera ku alumnonan ta haña mas chèns pa desaroyá nan mes. E deseo ta pa tin mas tempu i atenshon pa lèsnan obligatorio i aktividatnan ku ta hasi falta aktualmente, manera aktividatnan kreativo, sistema di mira bida, abilidadnan ku kompiuter, deporte, i ekskurshon.

Lógikamente pa logra e metanan ei, mester alargá e oranan di skol. Ei e diskushon ta kuminsá. Algun ta argumentá ku tra’i merdía ta muchu kalor pa skol, dosentenan lo haña mas pago?, ki ora muchanan ta bai traha nan huiswerk?, èts. Otronan ta haña ku e ta solushoná e problema di “opvang”, e mucha ta haña mihó formashon, antes tabatin skol te 3’or, èts.

Pero tin un pregunta simpel ma importante ku mi’n ta tende hende hasi. E pregunta ta: **Yu di ken e mucha ta?**

E kontesta ta opvio i tin hopi implikashon. E no ta yu di skol, e no ta yu di dosente, e no ta yu di gobièrnu. Ta mas kla ku di dia ku e ta yu di su mama i su tata. **Mayornan ta esnan ku ta responsabel pa edukashon di nan yunan.**

Di bèrdat, mayornan—no skol—ta esnan ku mester eduká nan yunan. Ora un mucha ta bai skol, mayornan ta duna e dosente un responsabilidat ku en realidat ta di nan.

Awendia nos a lubidá esei por kompleto. **Hopi mayor ta pusha responsabilidat pa nan yunan riba otronan.** I nos komunidad ta fasilitá esei. Ora e yu nase, e ta bai krèsh i mama ta bai trabou. Dj’ei e ta pasa dirèkt pa klùterskol, siguí pa skol básiko, SGB, te porfin e yu ta bai! Fo’i nasementu e yu tin ku kustumbrá di bandoná kas mainta tempran i yega atardi lat.

Hopi mayor ta gusta asina! Algun ta tristu ku ta alargá e orario di skol te 3’or...nan kier e te 5’or! Ta kumbiní nan mas.

Ma warda un ratu! Unda nos ta bai? Si e yu ta lamta 6’or di mainta i ta bai drumi 8:30 anochi, por bisa ku 10 di e 14½ ora ku e ta lamtá e ta na skol. Su tempu na kas ta ni 5 ora. Kuantu tempu mayornan por dediká pa e yu? Kuantu influensia nan lo tin riba e yu? Ta visto ken lo tin mas influensia riba bo yunan!

Aktualmente mi yu ta na skol sinku ora tur dia, i ku esei so e ta bin kas ku tur klase di maldat ku otro mucha ta hinka den su kabes. Mi no ta deseá pa e haña mas influensia negativo pasobra e t’ei 8 pa 10 ora!

Mi tin problema serio ku e filosofia tras di “alargamentu” ku nos ta aseptá ku wowo será. Frankamente bisá, **un motibu sigur ku nos ta papia di alargamentu di orario di skol ta pasobra mama no ta na kas mas!** Si mama ta na kas ora e yunan t’ei, e tata lo por kobra un salario mas respetabel pa kuida su famia. Awendia, asta wowo di algun fememista radikal ta habri. Nan ta kita di trabou i ta bai kas bèk pa invertí tempu ku nan yunan.

Beibel ta bisa ku mester siña muhénan hóben “*pa stima nan yunan, pa ta...bon ama di kas...*” “*Ama di kas*” den e teksto aki ta nifiká literalmente trahadó na kas. Un tarea “importantísimo” di e mama na kas ta pa traha duru riba formashon di karakter di su yunan. Pa kasualidat awe mi a lesa pa mi yu e dichonan ku rei Lemuel su **mama** a siñ’é den Proverbionan 31.

Ma ta un echu tristu ku hopi mayor tòg lo no dediká tempu pa nan yunan. Pues, di bèrdat **mester papia di edukashon di mayornan...di henter e komunidad!**

(Mi tin kompreshon pa e mama soltero, ku talbes ta deseá di keda kas ku su yunan ma pa motibunan finansiero e no por.)

Tata, mama, bo yu ta **BO** yu. Ningun otro por remplasábo! Ningun otro lo stima bo yu manera abo ta stim’é, ningun otro lo forma bo yu manera abo por hasi! Skol no por remplasábo. Bo yu ta bo responsabilidat! E diskushon tokante alargamentu di orario di skol mester sirbi komo un sirena pa lamta mayornan for di soño pa nan kumpli ku nan tarea manera debe ser!